

Le Poisson Cest le nom du Gouverneur de Manath ou nouvelle York a fort recomandé aux Irroquois de ne me pas Escouter & sur tout de me donner de garde de mes Lettres son party seroit bien foible, Si ma plume le pouuoit renverser Mais Il faudroit que l'Esprit de Dieu sen meslat. Et Je Crois que ce seroit les pechez des Anglois rebels a leur Roy & a la foy plutost que ma plume qui les renuerseront, Nous Voyons et nous Entendons passer Icy tant de choses mal concertées qui viennent des Anglois que les Irroquois Semblent beaucoup plus raisonnables qu'Eux quand Ils ne Sont pas Yures.

Les Onneiſts mayant adopté pour un nommé Otaseté qui de son uivant Estoit homme de Conseil Et qui passoit de toute ancienneté pour auoir [été] un des Soutiens de la Nation Ils mobligent quelques fois dassister aux Conseils quand ce ne seroit que pour scauoir dequoy Il est question pour leur en faire rapport au moins quand ce sont des choses de Consequence pour le pays.

Les Anglois Et Ceux qui suiuent leurs Interests Ont peine de my voir Ils voudroient bien men Exclurre Et me priuer de voix actiue et passiué, Les vrays Onneiſts au contraire & Ceux qui soutiennent encores Les interests de la foy & de leur terre my autorisent le plus quils peuuent, Et comme l'honneur de Dieu & de l'Eglise se trouuent bien souuent meslez dans ces sortes d'affaires publiques, Je suis obligé moymesme de parler dans plusieurs occasions qui regardent le Seruice de Dieu parceque les Sauuages qui dependent des Anglois pour la traite n'osent ordinairement rien dire qui leur puisse deplaie, Et Je ne connois quasy que notre bonne